

Canoungé George

Sènso regrèt



**ED de La Méditerranée
Avignon - 1970**

I - LI POUEMO

FARNIENTE

Souto la triho
d'uno famiho,
dins lou repaus,
lesi pas faus,
lou tèms s'esquiho
qu'es meraviho !
Es en coungié
L'ome-bergié.

De flour superbo,
de bònis erbo
tout à l'entour
fan de sentour ;
lou soulèu douno
panca d'autouno,
un vènt d'uba
decesso pas.

Uno figuiero
sèmpre pariero
porge si fru
tant que n'a'gu ;
au founs i'a l'aire ;
que, blu, s'esclaire
de la lusour
d'aquest bèu jour.

A nosto drecho,
vesioun estrecho,
i'a dous abet
espés e dre,
sèmbon aquito
dous acoulito
o dous sarjant
souloumbrejent.

Deman, la vilo
vasto e moubilo
retroubara
lou desoubra ;
soun coungié passo
e la meirasso
fin-qu'à la mort
lou voudra fort.

COP DE FUSIEU

A la cimo d'un aut sapin
nous douminavon dos tourtouro ;
se vesien lou sèr, lou matin,
èron bèn tranquilo à touto ouro.

Un cassaire de mi doulour
se cresènt de faire uno aubeno,
tirè sur la blanco coulour
e la desquihè sènso peno.

L'autre aucèu s'envoulè subran
dóu tèms que l'autre davalavo,
mai de branco arrestèron plan
la blessado à mort que badavo.

Noste cassaire, un segound cop,
tirè, mai sènso la descèndre ;
la retenien de famous cro,
finalamen deguè se rèndre.

Aurié miés ra de pas tira,
de leissa viéure li tourtouro,
un couble perfèt, benura,
foro quand, sot, l'ome s'aubouro !

23 de juliet 1974

LUNO DE MEU

Es à-n-aquéu moumen que gaire l'on s'avisò
Di deco e di travès que soun dins noste amour :
Auren de digeri ço que, vuei, noun divisò,
Quouro vendra lou tèms, pu tard, dins la temour.

Es un tèms de melico e n'en fasèn l'istòri.
Es pas que talamen siegue sustanciau ;
Dins sa definicioun se dis que prouvisòri ,
Mai, aro, sian urous e nous rènd tucle, siau.

Quau ansin noun voudrié pèr d'àutri demouranço
Un parier estamen que tant farié de gau ?
Parlen pas di partit poulitico de Franço.
Mai dins de roudelet e dins mant-un fougau ?

Se dis d'aquéli luno èstre bèn encapado
Quouro, di dous coustat, sabon se digeri
Sènso trop de degai, sènso trop d'espouscado
E quand l'amour prefound risco pas de peri :

Es un nouvèu vengu que fai lou contro-mèstre,
Uno femo en service e pèr lou proumié cop,
Es un jouine escoulan esfraia dóu cabèstre,
Un vicàri, un curat, dins soun courrènt pas trop.

Ié meinaja de luno es uno causo sàvi
Noun pas vougué, subran, li buta dins l'acioun ;
Ié vendra qu'oubraran coume an fa nòstis àvi
Pèr uno obro bèn facho e de benedicioun.

Noun es luno de mèu uno nouvello annado
Que nous debanara mai de si tres cènt jour,
Avèn que de prega coume à l'acoustumado
Lou Diéu Ounnipoutènt qu'agis, de soun sejour,
De bon e de marrit aura coume toujours !

Se veramen lou mèu enviscavo la luno,
Raiarié, se foundènt à l'aflat dóu soulèu,
E restarié que l'astre, en la formo coumuno,
Fre, escleirant la terro e l'espargnant de flèu.

La fin d'aquéu moumen es quouro l'on se charro :
Eu, Elo, es rèn qu'acò ?... Iéu meme, dequé siéu ?...
Que noun siegue perfèt emé resoun s'aparo
L'autre emé si défaut qu'an rèn d'èstre agradiéu !

Adounc fau se soumettre i causo de la terro,
Nòsti pèd bèn pausa sus lou sòu gravelous.
Fasèn quàuqui bèu raive, es pas marrido guerrou,
Mai, tau que sian, avèn de s'ama tras qu'urous :
Es alor qu'acoumenço un coumbat valourous.

29 de janvié 1971

MEINAGE SAGE

Es lou coungié, noua fau parti :
Noun poudèn èstre, eici, tranquile,
De que dirien, nòstis ami ?...
Que sian d'avaras, d'imbecile !

Ai envejo dóu ribeirés
De nosto bello Mieterrano ;
Mai parèis que, se ié fai fres,
Lou mounde que i'a vous engano.

Alor, s'anavian, dins lis Aup,
Respira l'èr pur di mountagno ;
Voua fai de bèn, acò se saup,
Mai garo au fiò que, lèu, vous gagno !

I'a forço gènt que soun ana
En Itàli, meme en Espagno,
Mai s'agirié de n'en tourna
Sènso avé marrido escupagno !

Pourrian tambèn faire semblant
D'ana coumpli quauque viage
Alor que restarian en plan
Pèr dejuna souto d'oumbrage.

Riscarian pas de se nega
Nimai de peri dins li flamo
E noste argènt, miés emplega
L'aurian pèr paga de calamo.

Pièi, à l'oumbro d'un arbrissèu,
Farian la siesto acoustumado
E, lis iue vira vers lou cèu,
Benesirian la vido amado.

Es Pascau, sabe, que l'a di :
Quau rèsto encò siéu bèn tranquile
Noun saup quant d'aucidènt maudi
S'espargno e viéu de jour facile.

Adounc resten tranquilamen
Pendènt que lou counegié se passo,
Auren ges fa d'enterramen :
Qu'un autre vague à nosto plaço !

D'ESCORNO AU CREATOUR

Un sujet qu'es inagoutable,
Tant pis se n'en sian detestable !
La soutiso dóu femelan
De l'infini balant lou plan :
Lou Creatour doutè la femo
De bèuta, deguno es la memo ;
Déurié, sèmblo, se countenta
De sis avantage eireta,
Eh ! bèn nàni ! S'atrobo morno
Au Creatour fai milo escorno :
Chanjo la coulour de si péu,
Li descouloro, soun plus viéu !
E, quand s'agis de couifaduro,
Countrarìo damo Naturo :
Si frisoun, lèu de courtesoun,
Ié fan de tèsto de garçoun.
Di man, di pèd lis ounglo roujo
Dirias qu'an fa d'acioun feroujo ;
Sis iue, que mandon de belu,
Li fan ciha, cintra de blu.
Malurouso de raço blanco,
Se fai bruni dins li calanco
Au ribeirés de nòsti mar
Pèr embula de palamard.
I'a d'ome, butant à la rodo,
Pèr-fin que seguigue la modo,
Noun pas vougué lou naturau,
Lou bèu, lou vrai sènso egau !

E, se parlan de l'abihage,
Pèr segui lou courrènt usage,
Tout ço que i'a de mal vesènt,
D'ouriginau, de miés lusènt
A la favour de la jouinesso
Que mostro gaire de finesso !

Accourchisson si coutihoun
Semblant d'alo de parpaïoun ;

Pièi, si mantèu, enjusqu'à terro
Escoubon la pousso mounto èro.
Es bèn mai qu'uno fantasié,
Es la soutiso e la foulié !
Autre tèms, la cabeladuro
Ero sacrado en parladuro ;
A la glèiso sènso capèu,
Deguno anavo, èro pas bèu !
E, pèr carga de braïo d'ome,
I'avié que... noun fau que li nome !
Se i'a de chanjamen urous
Quant n'i'a d'autre que soun neblous !
Li femo, se saup, soun mouqueto,
Caduno porto uno etiqueto
Que mostro ço que i'a dedins :
S'es de sérieux o de verin !
Quant fai plesi de vèire encaro
De femo, respetant sa caro,
Se vestissèn bèn coume antan
Nòsti maire qu'an viscu d'an !

DE QUE VAU MIES ?

Qualita, quantita, de que vau miés di dos ?
Aquéli dos valour quàuqui fes se coumplèton.
Mai, de-fes, se fan contro. Alor, de qunto vos ?
— Es difficile à dire e li mot se repèton.

Fai gau, souvènti-fes, d'avé la quantita.
Un bèu noumbre, de pople : es la demoucracìo !
E rejouis peréu d'avé la qualita :
Sciènci, vertu, ounour, acò's l'óuligarchìo !

Mai tout depènd di cas : Quand s'agis d'un acamp
Pèr libramen ausi quaucun de sciènci grandò,
Sus un sujèt precis, vague un ome marcant :
« I'avié-ti forço gènt, l'absènt, alor, demandò ?... »

Quand s'agis d'espetacle, es quasimen parié :
La qualita dóu mounde e de soun aut parage
Comto pas trop ! Pamens, la noblo coumpagnié
D'un catau, d'uno talo avalouro l'óubrage.

Se s'agis d'uno messo o d'un enterramen,
La foulo que ié vai ounouro Diéu, Grand Mèstre,
Subre-tout la famiho à-n'un triste moumen :
Es un soulas uman qu'apasimo un mal-èstre.

Quand vendra noste tour d'èstre en terro pourta,
Se i'a forço devot pèr nous faire coumpagno,
Se poudèn tout avé, quantita, qualita,
Urous saren, alor, car la preguiero gagno !

2 de febríé 1971

FESTENAU

Li jour caud de juliet, d'avoust,
I'a, encò nostre, gràndi fèsto.
A la nuechado, l'èr es dous
E, pèr li gènt que n'an lou goust,
Se pòu jouï sènso countèsto.

Dins li vièi tiatre Rouman,
Se jogon d'obro magistralo
Que fan souvènt pica di man,
Que mostron coume lis uman
Subisson li scèno fatalo.

E pièi li meïour musician
En soulisto o dins lis ourquèstro
Vous chalon l'ausido en jougant
Li moussèu classi dis ancian,
Quand lou menaire agis la dèstro.

Dins aquélis acamp requist
Se prouduson mai de couralo ;
Soun armouniò, m'es avis,
Es avans-goust de paradis,
Despasso lou cant di cigalo.

I'a pas que lou plesi di sèns,
Dóu bèn manja vo dóu bèn béure
Que dèu coumta, que vau l'encèns,
Se noun sias coume d'innoucènt
Vi gau superiouro fau viéure.

Amateur dóu bon e dóu bèu,
Sougnas lou bèn-èstre de l'amo
Benuras-la de si flambèu ;
L'Esperit, e tras lou toumbèu,
Vau miés que l'ase, quand reclamo !

Vau-Rias, 27 de juliet 1971

LOU CORSO DE VAU-RIAS

Vuei, es la voto à Vau-Rias,
Voto dicho de la lavando
Qu'escarrabiho li marrias,
Car aquesto fèsto coumando.

Li panard, li goi, li gibous,
Li nanet permié li gènt lèri
Ié courron vite e tras qu'urours,
Jouine, vièi, n'en fan pas mistèri :

Es la voto, avèn de i'ana
Vèire s'esbaudi la jouinesso
E, lis enfant, soun de mena,
Car li parènt i'an fa proumessos.

A-de-rèng veson defila
Li group nouvèu de majoureto,
De coumtadino e li fada
Coumtant sus quàuquis amoureto.

I'a pièi enca de musician
Qu'au pas farien marcha lou mounde
Emé si tambour entrinant,
Si cleiroun sounant pas trop mounde.

Lou pu bèu, li càrri flouri
Tira pèr de moustre de ferre
S'avançon plan, enfantouli,
Car plen de pichot li van querre.

Soun deguisa, enmouresca,
Chato e nistoun ié fan tèmpèri ;
D'éli, paire, maire enmasca,
Li bèlon, escap de misèri.

Li gènt que li veson passa
Li clapeton, iè fan bouqueto,
An bèu, de luen, èstre alassa
Ié fai pas mai, raço lisqueto !

Vuei, es la fèsto a Vau-Rias,
Fèsto dicho de la lavando,
Quau noun ié vai es un marrias,
Car aquesto fèsto coumando.

Se, pèr Diéu, se fasié parié
Prenènt peno e biais pèr sa glòri,
Lou mounde pu sage sarié
E miés segur de sa vitòri,
Quouro prenon fin si belòri.

7 d'avoust 74

LA DEVISO ENGANARELLO

A Dono Lacombe, Flouregiano

Pèr voste mandadis, gramaci, gènto Dono !
Siéu sousprés emé gau de voste grand gentun.
Troubarié, Sant Enri, que vosto idèio es bono
D'emplega li tres mot di Rouge dóu gros grun ?...

La Liberta, ma fe, Diéu la respeto en l'ome.
Fau crèire, adounc, crestian, qu'es encaro un benfa.
Ié fai d'ounour, ansin, e, coume que se nome,
Lou jujara sus l'us que, libre, n'aura fa.

Quant à l'Egalita, causo proun messourguiero,
La vouguè me pareis uno bello foulié :
Mistral emé resoun, dis que, dins sa renguiero,
Li cinq det de la man soun pas tóuti parié.

Pèr la Fraternita depènd, acò, de nautre :
S'ama lis un, lis autre e se faire de bèn
Se pòu e lou devèn, mai quau respond dis autre ?...
Li marridì passiouun fan que n'en rèsto rèn.

Pleno de sentimen e de delicadesso,
Vous sèmblo, acò, facile, uman, crestian, nourmau ;
Li pèd bèn sus lou sòu, o bravo Felibresso,
Fau pensa que Cifèr bouto l'iro e lou mau.

Viran-se, niuech e jour, vers Diéu e lou santisme
Pèr-fin de se garda l'amo e lou cor tout blanc.
L'Ile de nòsti Rèi, fidèu à soun batisme,
Valié miés pèr mira que la coulour dóu sang !

Vau-Rias, 19 de Juliet 1971

ELEGIO

Sièu ana, vuei, au cementèri
Ounte i'a plus, de mis ami,
Que li noum flouca de mistèri
E lis os en terro endourmi !

Ai pas roumpu lou grand silènci
Senoun pèr prega noste Diéu
D'óublida deco e counsequènci
De si pecat desagradiéu !

Antan, i'avié de bon felibre
Qu'an fa sa plego em'estrabord ;
Aro, l'endré n'en rèsto libre,
Mai lou parla sèmblo pas mort :

Lou Felibre de Nosto-Damo
Que soun noum èro Ougèni Imbert,
Barthelèmi, canounge flame,
Bechet, Allier cantant sis èr.

Flouriguè La Poumo Vau-Riasso
Èmé l'ajudo de Payan ;
Aro, i'a plus rèn à la plaço
Senoun lou trafé di marchand.

I'avié peréu de chato amado,
Forço piouso e cantairis ;
Aro, soun vièio e soun nafrado
De l'atuau boulegadis.

Anain lou mounde vai e viro,
Li gènt passon e fan soun tèms ;
Rèste darrié, quand tout treviro,
Pèr lou record dóu vièi toustèms.

Vau-Rias, 22 de Juliet 1971

PER ENNOUBLI LOU VERBE

Se saup que i'a de gènt qu'emplegon lou lengage,
En foro de l'usanço e di vâni resoun,
E tambèn dis afaire ounte an risca de gage,
Pèr se vanta, menti, mau parla sèns besoun.
Emé soun èr de rènn, senoun emé la cagno,
Soun jalous d'amistanço e de pas entre egau,
Se dis que vous farien se batre li mountagno,
Soun de marrìdi lengo, arroinon de fougau !
Quant n'i'a que parlon gras, qu'an un voucabulàri
De groussieras qu'an ges agu d'educacioun ;
Salisson lou parla sèns avé d'un auvàri
Lou desfèci cousènt, escuso de l'acioun.
Pèr contro, i'a d'ami que fai plesi d'entèndre,
Que, de-longo, ausirias, se n'avias lou lesi ;
Si dicho soun de chale e vous fan li coumprèndre,
D'éli, facilamen sarias amourousi.
An pas d'un avoucat o d'un parlamentàri
L'elouquènci chanudo em'un founs de valour,
Mai penson lou verai, renegon soun countràri
E vous bouton au cor de joïo e de calour.
Soun parla risco rènn d'avé de secaresso,
Assabento, endrudis, counforto sèns enuei,
Vous dis ço que vai pas sèns ges d'amaresso
E ço que sarié miés dins lou mounde de vuei.

D'ennoubli lou parla i'a, se dis, dos metodo,
Dous mejean soubeiran e qu'embulon jamai :
Pouèsio e Preguiero an de quita la blodo,
De se vesti de bèu, coume lou mes de Mai,
La proumiero, d'abord, dins l'estile e li règlo,
Pas facilo, verai, mai butant au perfèt
Emé si mot requist — de pan noun fa de seglo —
Disènt de sentimen ispirant lou respèt,
De pensado peréu noblo e noun sèns efèt.

La preguiero, de mai, es uno autro maniero
D'ennoubli lou parla, de lou santifica :
Dire au Paire dóu cèu sa fervour matiniero
D'enfant, de pecadou pèr naturo endeca ;
Espremi si regrèt, au sèr de la journado,
Lausa l'Ounnipoutènt en grando umileta
E ié recoumanda sa fin, sa destinado
Es acò l'esperit de fe, de santeta.
De pas countrista Diéu lou gènt, alor, s'aviso,
Chausis li mot requist autre tèms emplega,
Aquéli di Sant Libre ounte se diviniso
Lou lengage de Diéu is ome qu'a crea

Quand lou Papo regnant vòu benesi la foulo,
Quand lou prèire à l'autar prego piousamen,
Quand de l'ome devot la preguiero s'escoulo
Lou mot pren de valour rènn que pèr dire amen !
Lou devis emé Diéu es coume un sacramen !

10 de febríé 1971

A LOURDO

De gènt de tout païs e de touto nacioun
vènon, dins aquest liò, coumpli si devoucioun.
Que l'Ome es religious soun uno bello provo
bèn que, lou mescresènt, badant, de-fes s'atrovo.

An-ti pieta veraio o bèn supersticioun ?...
— La majo part a fe dins lis aparicioun,
crèi en Noste-Segnour, à sa Touto-Puissanço,
à sa divino Maire, à la Rèino de Franço.

Soun mèmbe de la Glèiso e canton soun « Credo »
em'un bèl estrambord d'enfant soumés, devot,
Vengu de forco luen, de Franço, d'Italio,
d'Anglo-Terro, d'Irlando, an fàm de meraviho.

Dison de capelet, souvènt, li bras en crous,
davans la santo Baumo ounte l'image blous
se vèi, dins lou roucas ; aqui, l'Inmaculado
dès-e-sèt cop venguè pèr sèmpre aluminado.

Cadun a dins soun cor de nòbli sentimen,
de besoun, de desi, quàuqui fes de tourmen,
debanon tout acò, li gau emai li peno,
n'i'a qu'an de plour is iue coume de Madaleno...

Pregon pèr si parènt, pregon pèr d'ami car,
soun carga d'entencioun qu'espauson sèns retard,
pièi, voudran, en record d'aquest sant roumavage,
ié manda de carteto en fidèu temouniage.

Lou vèspre, tourna mai, cantaran lis ave,
milo cire atuva faran mostro de fe ;
lou riban lumenous emplira l'esplanado
e se debanara coume à l'acoustumado.

Lou mai pognènt que i'a, es li pàuri malaut,
cadun, dins sa veituro, adu de l'espitau
pèr quauque brancardié vo pèr d'àutri persouno
que soun devouamen, pietadous, noun estouno.

Es pèr la proucessioun dóu divin Sacramen
o bèn pèr, à la Croto, èstre de long moumen.
Aqui, tóuti li mau e tóuti li misèri
pougnon li cor sensible emai li cor de fèrri ;

aqui, vesès d'avugle e de paralisa,
de gibous, d'anourmau que vourrias pas beisa,
de gros e de pichoun qu'an uno ourriblo caro,
lou rebut dis uman qu'espèro, espèro encaro !

Lou miracle es plus rar que la counsoulacioun :
la visto di plus mau baio resignacioun
e tóuti tournaran aguènt carga paciènci,
l'espèr, pèr l'en-dela, sara la grandò sciènci !

An begu e béuran l'aigo vivo di font
coume l'a demanda la Vierge, pèr de bon,
e, s'encò di malaut, s'es pas vist de miracle,
sis amo emai si cor soun coume un tabernacle !

5 d'avoust 1971

LI DOS PARLADURO

Desirous de serva la lengo
Un counfraire me diguè'n jour
Que, nouma curat de valengo
Dóu coustat de noste Ventour,
Assajè, s'adreissant i pastre,
De ié charra lou vièi rouman :
La responso fuguè, desastre !
En marrit parla franchimand !

Iéu-meme, curat de vilage,
Ausiguère de parrouquian,
Quand vouguère ié parla sage,
Noun pas me respondre : - Eici sian !
Emplega la lengo franceso
Coume pèr dire : - Sian sabènt !
Couneissènt, parlan sèns pereso
Lou francés dis escolo i gènt .

Se sentien-ti quauco vergougno
D'èstre dóu pople prouvençau ?...
Auriéu pouscu n'avé la fougno
De soun devis mancant de sau !
Pèr iéu èro uno trahissènço,
Un renegamen sèns resoun
Dóu verbe, despièi sa neissènço,
Dins sis oustau, pèr si besoun.

Coume voulès que se mantèngue
Noste lengage bèn-ama,
Quand disès : - Digo-ié que vèngue !
Que se respond : - Sian desmama !
Adounc, la lengo naciounalo,
La fau counèisse e parla bèn,
Emai nosto regiounalo :
Fara pas èstre grand sabènt !

10 de mars 71

LA SANTO TERNITA.

Que i'ague un soulet Diéu e tres persouno en Diéu,
Es uno verita que jamai l'amo umano
Aurié pouscu trouba, s'uno voues soubeirano
L'avié pas fa counèisse, aquelo dóu Diéu-Fiéu.

A charra de soun Paire emai de l'Esperit,
Nautre, l'avèn creigu d'uno fe sèns countèsto,
E, de la Ternita celebran la grand'fèsto,
Adourant lou Santisme emé de cor countrit.

Sian esta bateja souto aquéu triple noum
E, sus nautre, fasèn de la crous un bon signe,
Envoucan lou Divin, bèn que fuguen pas digne,
Quouro avèn de prega vo demanda perdoun.

E se porto un bijout, la marco dóu crestian,
Vau miés moustra de crous que de simbèu tout autre
Aguènt, coume valour, d'interès que pèr vautre ;
Noun fau avé la pòu que vegon ço que sian !

Avèn de manteni l'us, à nòsti repas,
De signa lou pan fres que lou chèfe entameno ;
Fai provo dóu respèt que l'on a sènso peno
Pèr l'alimen requist de nòsti mèmbe las.

Es vergougno de vèire, en vilo subre-tout,
De tros de pan jita permié lis escoubiho ;
Devon pas l'espargna dins certàni famiho,
Voudriéu saupre, pamens, que n'auran fin-qu'au bout.

L'on se signo tambèn quand trono e fai d'uiiau,
Quand lou dangié se sènt o que sian en partènço
Pèr nautre, lou pousquènt, o pèr la man dóu prèire,
Noun pèr supersticioun, mai contro l'infèrnau.

Enjusqu'au grand viage, enfin, pèr l'en-dela,
Pousquen-ti nous muni dóu signe sant di crèire
Pèr nautre, lou pousquènt, o pèr la man dóu prèire,
Fisançous de la crous, sènso mai carcula !

Coume, au siècle quatren, Coustantin l'Empeire
Contro soun enemi Massènço coumbatant,
Uno crous, dins lou cèu, l'apareiguè subran,
Veguen, nautre peréu, lou sant signau dins l'aire
E lou salut finau vincèire dóu malan !

9 de jun 1971

BONO USANÇO DE LA BOURDIHO

d'après Bernard Fay

I'a quicon de vrai qu'empacho de se crèire :
Naissèn dins la bourdiho avans de pousqué vèire
E, proun de cop, se mor à-n-un triste moumen
Dins nosto saleta, dins nòstis escremen !
Es encaro vrai que, pèr noste entourage,
Lèu-lèu sian aproupri, car nous espèro un viage,
E, quouro sian malaut o bèn quouro sian vièi,
Nous tènou neteja, lou sale arribo pièi !...

De la mau-proupreta qu'ansin nous es nativo
Au pourridié finau se fai la cerco ativo
D'èstre en foro de tout ço que councho l'uman
Au fisi, au mourau, car d'èstre propre aman.

Es pas pèr rèn qu'usan d'essènci de lavando
E d'aigo de Coulougno ansin fasènt mirando ;
Noun sian, au naturau, d'enebriant bouquet
Meme se nous voulèn farot e farlouquet.
Autre-tèms, subre-tout, la modo èro seguido
De parèisse i vesin dins lou bèu de la vido
E di sentimen noble e meme religious,
Senoun forço devot dóu mens proun catihous.

Se l'ome ansin vivié, acò noun l'empachavo
De subi, dins soun cors, ço qu'un jour lou couchavo,
De vèire se gausi tout ço que ié servié,
Viésti, machino, óutis qu'emé regrèt perdié ;
Mai, d'aquéu tèms passa, la bourdiho èro minço,
Soun passage proun court, pas'tant que d'uno cinso,
Leissavo respira lou bon, lou pur alen
Dins li fourèst, li champ, lis oustau e li gènt.
Lou siècle a bèn chanja ! Malo-di l'endustrìo,
La bourdiho a creissu, menaço li famiho,
S'expandis de pertout, degaio la bounta
E sèmblo doumina nosto soucieta.
Dins li vilo, devèn l'óussessioun di desvèri

Quouro dis óubrié la grèvo es un auvàri ;
Li carcasso d'auto, li mouloun de papié,
Li bouito de counservo e manti friparié...
Sènso óublida, parai, li gaz e la tubèio,
Aquelò dis usino ounte la sugo es vièio.
Coume nosto mounedo, acò fai d'enflacioun
Qu'eisijo de defènso o de revoulucioun.
Sènso óublida, de mal, nòsti bèlli ribiero
Carrejan de pousoun bandido sèns maniero
Enjusqu'à nosto mar empudido à soun tour
Pèr de mazout nadant e tuiant à l'entour.

L'ome noun pòu fugi lis efèt di malastre,
Noun pòu, quouro n'i'a trop, escala sus lis astre :
Es vitimo e subis, en mai dis elemen,
Lou degai que ié fan si fraire d'un moumen.
E se parlan enca di bourdiho verbalo
A la Radio, Télé, dins la Preisso atualo,
Disènt tout, l'escandale e crime crapulous
Sènso necessita que de plaie i curious.
Bourdiho que li gauto e li cueisso di femo
Qu' autre-tèms s'escoundien - pudour siés plus la memo !
Fan d'efèt desastrous sus li jouine e li vièi
Encauso de pecat contro li sànti lèi !

Bourdiho dins li Letro e dins lis escrituro
Ounte respeton rèn, ounte tout es naturo ;
Li libre, li Journau e li revisto ensèn
Matrasson li cervèu e ié lèvon lou sèn.
Fai peno d'esbrudi ço que, dins nosto Glèiso,
Se passo de nouvèu. Lou vièi crestian se tèiso,
Noun saup s'a de suivi vo s'a de resista,

Gardant sèmpre si crèire e sa bono pieta !
Bourdiho au Parlamen ounte se legifèro
Contro la lèi mouralo e la Franço prouspèro.
De talo modo que, s'avèn de la quita,
Regretaren pas trop esto soucieta.

PALAX GRATIA ET VANA EST...

Prouverbe : Es pas bèu ço qu'es bèu...

Agradivo se sènt la gràci, dins la chato ;
Es mai que, de la flour, la sentour e lou flar ;
Es l'engano d'un tèms qu'ensarro, embulo, amato
Lou jouvènt que se fiso is astùci de l'art.

Atraïènto se fai la bèuta de la caro
E di formo dóu cors superbe, bèn moula ;
Vendran li frounsiduro e li péu blanc encaro
Emé de malautié souto un soungé vela !

Li gènt parlon souvènt d'uno bèuta dóu diable
Que permès i mesquin d'atrouba soun parié
E de se marida d'un biais proun counvenable,
De noun resta pèr grano e d'èstre au rastelié.

Acò vau pèr li femo emai vau pèr lis ome
Qu'an la bèuta fisico e la forço di bras ;
Se l'uno atiro l'autre, alor lou jouvenome
Seguira soun atra, benurous de soun cas.

Nous arribo, de-fes, en ausissènt de femo
Qu'emé grandò teletò emé soun fres mourroun
Sèmblon de doun requist esvartant li lagremo
Qu'avèn d'enganamen, soun parla lou dis Proun !

Uno gràci veraio, uno bèuta noun vano,
Es aquelo dóu cor e di bèu sentimen,
Noble , caritadous, delicat puramen,
Fru de l'educacioun crestiano, pas moundano,
Que, meme dins li vièi di maniero pagano,
S'adevino e se sènt fin-qu'i darrié moumen !

Vau-Rias, 26 de juliet 1971

LA SERVICIALO

S'avès grand besoun d'uno ajudo
Pèr-fin de teni voste oustau,
Aurés de peno — esclavitudò ! —
Pèr l'atrouba coume vous fau ;

Tambèn forço Dono-Mestresso
Fan éli-meme lou travai
Coume podon, sènso amaresso,
Quouro s'avison d'un degai.

Car la bono comto sis ouro,
Eisijo eiço emai acò ;
Dis, senoun qu'a plaço meïouro
E pòu vous quita sus lou cop.

Li Dono pèr quau es necite
Acèton, lor, li coundicioun
E volon saupre vite-vite
Se l'autro es à sa devoucioun.

Faire ço que l'on vous coumando
Es-ti manca de digneta ?...
Noun ! Mai l'óbligacioun es granda
D'avé de Mèstre à contenta.

De catau avé la fisanço
Es, au founs, recebre d'ounour ;
La bono ajudo es uno chanço,
Dèu s'estima coume lou jour.

Soun devé, lou saup pèr avanço :
Viha sus ço qu'es precious :
Enfant, chin e cat de trevanço,
Argentarié, moble coustous.

A tèms passa, dins de famiho,
Gardavon li vièi serviciau
Meme emé si forço en douliho,
Fasien partido de l'oustau.

A la bono, à la servicialo
Ounour quand coumplis soun devé ;
De Paris o bèn prouvincialo,
Fugués benurous de l'avé.

Un mot dóu Crist nous vèn aquito ;
- Dis au bon e fidèu servènt,
Estènt qu'a gagna de talènt,
La lausenjo que s'amerito :
La gau dóu mèstre ié counvèn !

Setèmbre 1971

PLAIRE, FAIRE PLESI

Es naturau de vougué plaire
à li que sian en relacioun,
nòsti superiour o counfraire

pau aclin i mouderacioun.

Es facila de vougué plaire,
pas poussible toucant de gènt
que soun pas tóuti proun amaire
e qu'an de goust tant diferènt.

Es necite de vougué plaire;
car, autramen, sian rebuta
que qu'aguen envejo de faire
o de dire emé franqueta.

Es l'interès de vougué plaire:
Se prennon mai de mousco au mèu
qu'au vinaigre fort, rousigaire:
noste la, gisclo di memèu.

Es i jouine de vougué plaire
quouro cercon de s'aparia;
se vanto, alor, ço qu'es pas gaire
e s'escound ço qu'es degaia.

Pas qu'un moumen tau vougué plaire
emé quau faudra viéure ensèn;
cade jour, auren de lou faire,
de bèn s'entèndre èstre counsènt.

Es agradiéu de vougué plaire
se pòu faire de mant-un biais,
noun que d'amour fuguèn de laire,
mai en moustrant quicon que plais:

Bèn marca dins nosto tengudo,
faire de doun, de bèu presènt,
charra de causo proun chanudo,
escouta siau o se teisen.

Aqito ounte avèn nosto intrado,
li visage soun sourrisènt,
l'on s'afisco e, pèr nosto astrado,
lis iue qu'amiron soun lusènt.

Vous sentès uno benuranço
d'èstre aculi coume un soulèu,
acò baio d'asseguranço
e mai de fisanço belèu.

De la jouvènço es l'apanage,

plaire es un doun, miés es un art,
eisijo un certan coumpeirage
pulèu sus lou cop qu'en retard.

Quand vougué plaire es uno engano
partènt pas d'un founs vertadié,
l'abileta, vano o pas vano,
que s'emplego es de cativié.

Se, vougué plaire, es uno quisto
d'amour de se, d'èstre ajuda,
fai bono obro quau nous resisto,
pratico ansin la carita.

Faire plesi es outro causo,
es un art forço diferènt:
noste desi ounte se pauso
douno soun cor à quau lou pren.

Nous bouto sus uno outro routo
d'oubli de se, d'annegacioun;
miés, ansin, l'autre nous escouto:
Lou bèu dire noun vau l'acioun.

Faire plesi es uno joio
que se sènt au fin founs dóu cor,
douno d'argènt o de beloio,
lis ama soun noste tresor.

3-4 de jun 1972

PRIMAVERO

Lis aubre crebon si bourroun
que s'espandiran en fuiage;
uno bando de passeroun,
sus li tèule, soun en vouiage.

Fai dous; l'èstro se duerb à brand;
lou cèu es clar, lou soulèu douno;
sian countènt, lou bonur es grand;
lou printèms davanço l'autouno.

De pertout s'amiron de flour,
flour de jardin, flour de campèstre;

an de sentour e de coulour,
agramenton noste bèn-èstre.

Vivèn li meiour mes de l'an,
abriéu e mai e jun encaro;
an forço obro, li capelan,
mai lou travai noun li descaro!

Se festejon em'estrabond
Pasco, Ascensioun e Pandecousto;
à li que, deman, saran mort
noste Diéu mando pas la rousto,

mai pulèu fai vèire sa lus,
la Verita, qu'à pèr óufice
de libera li pàuri gus
de l'errour e di malefice.

Gramaci! Moun Diéu, gramaci!
d'èstre nascu pèr vous counèisse
dins tout lou bèn qu'avèn eici,
dins lou cèu, que fasès parèisse!

Abriéu 1972

A FERIGOULET

O naturo tranquilo, ô desira silènci,
de vous avé bela noun aurai repentènci,
car alassa dóu mounde, e noun sènso resoun,
despièi quàuqui long mes, de vous aviéu besoun.

Es pas rèn un piéu-piéu canta pèr l'auceliho
e lou japa d'un chin, eilalin, ounte viho,
à coustat dóu trafé que fàn li ciéutadan
courrènt d'eici-d'eila cadun vers soun eimant.

Veici que, lendeman, dins nòsti mountagneto,
S'es leva lou mistrau jougant di castagneto
dins li branco de pin ounte rounco à lesi;
nous enuio pas trop, nous fai meme plesi

Quouro toumbo uno pigno, uno erbo la recasso
e s'oublidavon, pièi, qu'es lou tèms de la casso.

nous lou remembron, lor, quàuqui cop de fusiéu,
lis ai ausi, subran, gaire desagradiéu.

Un vèspre, ai escala sus lou cresten di mourre,
coume siéu vièi, ai pres moun alen sènso courre.
d'arbrissèu espinous, que sabe pas soun noum,
n'l'avié dintre li pèiro un pau roso, en renoum

Es dins aquéu mitan que s'aubouro uno glèiso
ounte la laus de Diéu quàsi jamai se teiso;
lou brut que fan li mounge es un cant pregadis
que duerb à mai que d'un l'intrado au paradis.

Sias un moumen sousprés, quand sa campano dindo,
l'Angèlus manco pas d'uno voues claro, lindo,
esvihant pèr un tèms li resson dóu valoun
fasènt foulastreja de ràri parpaïoun.

Lou pichot Frederi, Dom Savié de Fourviero
avans iéu a treva li colo roucassiero.
lou record se n'en gardo à la santo Abadié,
pèr segui si leiçoun noun vole èstre tardié.

Ai ausi,ubre-tout, dins aquéu car silènci,
d'un sant ome de Diéu la toucanto elouquènci
que nous a repassa li gràndi verita,
car, un jour, en mourènt, auren de tout quita
pèr ana de-vers Diéu, benesi sa sentènci.

15-16 de setèmbre 1971

LOU MISTRALAS

Mistrau, Parlamen e Durènço

soun li tres flèu de la Prouvènço
(Vièi prouvèrbi)

Sian au mes de juliet e noste mounde espèro
de jour clar, de jour caud, un tèms de paradis
pèr ensèn festeja lou bonur de la terro,
viéure en santa, en pas, un repaus cantadis.

E vaqui lou mistrau que, despièi de journado,
quatre, cinq, sièis e mai bouto en grand maufatan
destéulissant d'oustau, esfraiant la meinado,

toumbant li fru, li liéume e, li flour, li gastant.

Fai parié sus la mar: coungrèio li tempèsto,
foro li grand batèu e li gros bastimen,
li barco tènnon pas, lou pescadou s'arrèsto:
Dins vòsti cop, moun Diéu, gardas-nous quàuqui bèn!

Sènso éu, noste Miejour sarié segur trop riche
e lou trop de drudiero à l'ome es gaire bon,
car se crèi soubeiran, pèr lou paure estènt chiche,
e peco de tout biais, quand peton pas li tron!

Malurous soun li fiò leva pèr escasènço,
lis encèndi cremant li champ e li fourèst!
Espetacle esfraious! e, de sa maufasènço,
quau fara lou dedu, lou comte eiat di frès ?

Sian urous quouro, enfin, calo lou vièi destrùssi!
S'èro un gènt, lou veirié qu'es un terrible flèu.
N'aurié-ti lou regrèt que noun sarié de lùssi ?...
De sa forço ourgueious, l'ome es un loup crudèu!

14 de Juliet 1972

INTELLIGENT E LIBRE

Touto la creacioun, cado causo à sa modo,
Glourifico lou Diéu de quau soun èstre tèn:
L'estelan ounte van d'ome emé si metodo
De mai saupre envejous e jamai proun countènt.

La terro e ço que i'a sus elo qu'es necite,
L'aire, l'aigo, lou fiò, dintre lis elemen,
E li liéume, e li fru que baion, sèns merite,
A ço que viéu e crèis, bèsti, gènt, d'alimen.

Li mar, lis oucean, dins li tres-quart dóu mounde,
Trafega de long tèms pèr l'ome e si batèu,
Qu'escoundon dins si flanc un pople de pèis mounde
Ounte se pesco proun, sènso bagna l'artèu.

L'aurié-ti dounc que l'ome à fougna sus soun Mèstre,
Ignourant d'ounte vèn e soun sort d'en darrié ?...
Aurié-ti dounc faugu que fuguèsse, soun èstre,
Pas libre, mai alor ges de merite aurié ?...

Glòri, ounour e laus, emai acioun de gràci
A la divinita qu'es, de vido, sourgènt!
Que s'enaure, d'eici, en travessant l'espàci
Lou cant estrambourda de l'ome inteligènt.

17 de novèmbre 72

DICHO DE MI PLATANO

- Sian ti creaturo, ô grand Diéu,
L'oublides pas, car tout es tiéu!
Emé li branco desfuiado
Dins l'aire poujan nosto uiado
E brandissen souto li vènt,
Lou jour e pièi, quand la niue vèn.
Nòsti pèd en terro soun ferme
E la tèsto crèis fin-qu'à terme.
La sabo mounto enjusqu'au bout,
Vai plan-plan, benuro lou tout.
Rèsto gaire de branco morto,
Lis an toumbado l'auro forto.
Quouro primo enfin tournara,
Fuiejado l'ome veira
Nòsti branco encaro preganto,
Reçaupènt de tu ço qu'encanto:
Li pèd sus terro, que li gènt,
Coume nautre, agon lou biais, gènt,
De crèisse vers tu, diligènt!

31-1-73

LOU DESTIN DI LIBRE

Es pèr tóuti parié di libre lou lengage,
Mai tóuti n'en fan pas benefice parié,
Car es Diéu, dóumaci, qu'ensigno ço qu'es sage
I gènt qu'an pas lou cor abrama de foulié.

Dóu founs de l'ome es Eu lou grand escandalaire,
Penetro li pensado e seguis lis acioun,
Baio à cadun si doun, estimo à soun vejaire
Soun ajudo au crestian segound sa devoucioun ».

Ansin, ço qu'ai escri pèr mis ami legèire

D'ùni n'an fa proufié, d'ùni just an presa
Lou bèu de l'edicioun e vite, trop courrèire,
Lou libre, sus li post, es esta remisa.

Es ansin, crese bèn, qu'espèron proun d'oubrage
Qu'un sage, en arrestant sa courso, luen dóu brut,
Ié pouso de valour, tout à soun avantage,
Coume l'aviéu vougu, perpensa, cresegu.
Vivo Diéu e Prouvènço! A vautre, lou salut!

21 de novèmbre 72

LI NOBLE

A passa lou bèu tèms pèr li nòbli famiho
Qu'avien de castelas, de serviciau noumbrous;
Qu'avien pèr lis enfant de precetour de trio,
D'equipage galant li permenant urous!

Ero un tèms! A coustat de l'anciano bastisso,
Avien la di fermié que tournissien, tout l'an,
Lou blad, lou la, lou vin e la gènt vouladisso
Quouro avien à dina catau o capelan.

An degu se priva d'abord di chinaredo
E de la casso à courre, un lùssi trop coustous,
En fourèst sôuvertouso o bèn en claparedo,
Si terro de raport estènt miés de soun goust.

L'Armado, lou Clergié, lou Magistrat de raubo
Eron sa destinado e soun biais de servi,
L'ounourabileta, qu'ansin jamai se raubo,
L'avien sènso countèsto e li rendié ravi.

Lis impost dóu Gouvèr, li marridi gerènci
E li lèi soucialo en favour di païsan
A-cha-pau an lesa si mejan d'eisistènci:
An degu forço vèndre en quisto de gasan!

Espitau, Municipe an croumpa si doumaine
E li noble en degu s'entraire d'un mestié;
Mai an garda, prefound, à défaut de soun maine,
Ço que li destingavo e lis anoubliési:

Pensado generouso, educacioun sougnado,
Parla requist emai un blasoun dins lou sang:

Dóu record dis anclan sa vido acoumpagnado
Lis an fa majamen reprendre un nouvèu vanc

Lou remèmbre peréu d'uno santo famiho,
De noble arrouina, dóu Rèi Dàvi venènt,
De Mario e Jousè, li parènt dóu Messio
En quau nòsti crestian, dóu salut, soun devènt.

De noum soun tras que bèu emé sa particulo,
Mai lou pople tambèn fournis de nòbli gènt
Que nous fai bon treva ounte l'ourrouir circulo:
De noublesso dóu cor noun fuguèn indigènt!

LIS IMAGE

Avèn sèmpre ama lis image,
Desempèi nòsti jouinis an
Enjusqu'à vuei qu'avèn proun d'age,
Mouvedis o siau lis aman.

Li recampavian dins de bouito,
Dins li libre emai li missau;
Pèr tèms de mistrau, quouro fouito,
Li gardavian di subre-saut.

Lis image quau li dispènso ?
— Li tableto de choucoulat,
Dins lis escolo en recoumpènso
E li gènt de glèiso en aflat.

Pèr darrié, de bòni sentènci
Soun sus lis image pious,
Pièi de preguiero e penitènci
Pèr nous rèndre pu religious.

N'i'a que n'en tapisson si mèmbe
De si carto, image, retra;
De ço qu'amon an lou remèmbre
Ié sufis de lis amira.

Aro, la télé nous impauso
D'image mouvènt pas rèn sant;
Ié sian davans, fasènt la pauso,
An sus nautre un efèt puissant.

Pamens, quand blesson la mouralo,

La fe crestiano e soun espèr,
La reacioun dèu èstre talo
Que ié coupan, en mai dis èr,
Sa visto qu'ataco li nèr.

Se gagno ansin pèr lis auriho
E pèr lis iue d'èstre engarda
De la pouisoun pèr li famiho
E de s'ana jaire enfada.

19 de mars 1973

LEVADO DE CASSOLO

Quand la Glèiso e l'Estat marchavon bèn d'acord,
Noste pople crestian vivié soun age d'or.
De marrits elemen n'i'avié, dins nosto Franço,
D'avans quatre-vint-nòu, lou tèms de maluranço;
Eron minourita que fasié pas grand mau,
La crestianta regnavo en un climat nourmau:
Emé si religious expandissié la sciènci
E, dins lis Espitau, di Sorre l'influènci,
Emai i Tribunau l'image de la crous
Entre-tenien la Fe, rendien li gènt pious.
Falié laïcisa de tóuti li maniero
La jouinesso d'abord que fasié de preguiero.
La Glèiso èro trop richo e trop libro d'óubra,
Sa missioun la falié pamens contro--carra!
Satan e si supost reprenquèron d'audàci
E, noun poudènt, alor, coumbatre fàci à fàci
Travaïèron lou pople e, sènso n'avé l'èr,
Fisèron si proujet à d'ome de Gouvèr.
Ansin se declarè contro la Glèiso-maire
La guerro qu'adeja fargavon d'empuraire:
Lou divòrci legau, entre Elo e noste Estat
La Chambro lou voutè dins sa majourita.
Se baiè plus d'argènt pèr l'entre-tèn di prèire,
Ço que l'èro degu, la raubacioun di rèire;
Alor li catouli paguèron tourna mai
Pèr lou clergié voula que faliguè jamai;
Alor, Sorre emé Fraire ensignant is Escolo,
Se veguèron bandi pèr dela mar e colo.
Pamens s'èro garda lou dre d'ensignamen
Dins un èime crestian, en priva, pauramen!
Diéu saup de quènti biais se subiguè d'auvèri

A l'Armado, i sant Liò, au tèms dis inventàri;
L'Estat raubè d'à-founs nòsti Coungregacioun,
Meme di pàuri mort raubè li foundacioun!

Ansin di Franc-Massoun uno orro poulitico
Nous amenè dos guerros, ô bello Republico!

Dos guerros que jamai se n'en sarian tira
Sènso l'ajudo, Vo! de nòstis Alia!
Arrouina, sauna, lou Païs se relèvo
Dins lou reboulimen, la foulié, sènso trèvo.
I'a de prougrès teini, scientifi, materiau,
Mai sian toumba bèn bas dins l'ordre e lou mourau!
Ai uno grandò pòu que lou Segnour castigue
Nosto Soucieta pèr-fin qu'acò finigue!

11 d'abrièu 73

FAIRE LEVA L'AUBO

« *Excitabo auroram* »

Saume 17 - V 2

Siege d'un gènt, siege dóu gau
Aquelo pretencioun sèmpre m'a fa sourrire
Quouro la legissiéu, en pregant coume fau,
Au libre de mis ouro, esperant quauque aubire.

Quau, d'efèt, pòu se crèire ansin fort e poutènt
Pèr faire davança l'aubo de la journado
Segound soun bon voulé, coume mèstre dóu tèms,
Coussejant de la niue lis oundo encadenado ?...

Lou gau a bèu canta estirant soun galet
Pèr-fin que lou jour vèngue aduguènt si daurèio,
L'aubo sara fidèlo à naisse plan-planet,
Se lou cèu es pas nive o tapa de tubèio.

Soulet, lou Creatour pòu à sa fantasié
Davança, retarda lou mouvamen dis astre.
Que farian, lis uman, s'un bon cop ié prenié
De nous leissa sèt jour dins la niue ?.. Quet desastre!

Aurian d'èstre coucha, dourmihous, pausadis
En esperant ensèn que lusiguèsse l'aubo,
Mai pamens li mestié de l'ome chanjadis

Quau li satisfarié ?.. Lou besoun noun se raubo!

Glòri, dounc, à l'Autour dóu jour e de la niue
Qu'un bon cop a regla lou reloge dóu mounde!
Quouro lou pregarai, enca durbènt lis iue,
Sara pèr-fin qu'au jour soun soulèu noun s'escounde

E que, dins l'en-dela, m'esclaire de sa lus,
Lus dis amo elegido e bono pèr lou vèire,
Eu, la divinita, la bèuta, lou trelus,
E que l'adourarai, aguènt fini de crèire.

2-4 de mars 1974

LOU PU BEU DIS ART

De moun Creatour doun secrèt ?...
De mi parènt bèl eiretage ?...
Se, vuei, me fan gau lis efèt,
N'en vèire l'encanso es d'un sage!

Diéu baio, parèis, en cadun
Li gràci que ié soun necito
Pèr coumpli, sènsò d'amarun,
Lis obro que ié pènso, aquito.

Iéu, s'aviéu cultiva lis art, —
Car sufis pas d'avé l'engèni
Fau lou travai e noun l'asard. —
Auriéu pas'gu de desavèni.

Lis ai tóuti pres à l'assai,
Tóuti me faguèron lingueto,
Mai res m'a di: - Countùni! Vai!
La vido butavo, mouqueto.

Amère pinturo e dessin,
Me n'en soubro enca d'eisemplàri,
Acò, noun èro moun destin,
Faguère autro causo countràri.

Pèr la musico aviéu de goust,
N'en faguère tant que pousquère
E m'ausiguèron, forço urous,
Dins tóuti lis endré mounte ère.

Escrincela de nòbli vers,
Escriéure de poulit pouèmo,
Agué lou Bèu de l'univers,
Lou Bon, lou Vrai coume tèmo.

Noun soulamen ai amira
D'Apouloun li formo plastico,
Mai quàuqui fes ai moudela
Pèr uno crècho magnifico.

Me sentiéu capable de tout,
Mai óubrave dins lou mediocre;
Anère jamai fin-qu'au bout
Pèr ajougne miés que lou socle...

E, balançant tant e pièi mai,
Pèr valoura de jour trop bistre,
Diéu m'inspirè: - Zóu! Filo! Vai!
Lou desi d'èstre soun menistre.

Mai arribè lou grand malan,
La grando-guerro e si misèri;
Sóudard fuguère d'an e d'an
Enjusquo que tournère lèri.

M'adounère, alor libramen
A m'alesti pèr lou grand-obro,
Car, d'esperiéu, sinceramen,
Pèr acò faire ère un manobro

Me l'an di, pièi lou crese ansin,
Es bèn lou miés d'óubra lis amo
Pèr i'ensegna lou bon camin,
Lou Verbe de Diéu que lis amo:

Pèr ié pourgi li sacramen
Que bounificon, santificon,
Assegurant lou sauvamen
A li que li glèiso traficon.

Lou mounde a-ti perdu, de iéu,
Li fru de mi talènt bèn paure ?...
Tant pis! se i'a gagna moun Diéu!
Tant miés! s'ai vougu, pièi, tout aurre!

Diéu es la normo di bèus-art!
Lis amo, facho à soun image,
A l'esplendour de soun regard

Dèvon soun rebat, soun carage.

Au cèu, la santo carita,
Se voulé de bèn, se n'en faire,
Es lou bon de l'eternita;
De l'ajougne es lou grand afaire!

Vèire Diéu, nosto soulo lus,
Dins sa reiauta soubeirano,
Dins soun engèni, soun trelus,
Quento meraviho pas vano!

E lou lausa, ié faire ounour,
Emé li sant, emé li santo,
Fara lou bonur dóu sejour,
Lou founs de l'inne que se canto:

E la Vierge segnourejan
Coume uno maire triounflanto
Animara'n fuble d'enfant
De davans la Ternita Santo

A Diéu, gràci d'avé permés
Que lou serve, indigne qu'indigne;
En fin-finalo me veirés,
Un di siéu, un miracle ensigne.

Febrié 1974

NOSTO-DAMO DE LA GARDO

Noun sabe se ma maire en mourènt, à Marsiho,
M'a fisa, soucitouso, à la Maire de Diéu
O s'es de soun sicap que la Vierge Mario
A sousta fin-qu'à vuei lou capelan que siéu.

Noun sabe se moun paire, un eisila d'Irlando,
Partènt subitamen pèr l'eterne en-dela,
L'aviè recoumanda, dins sa cregnènço grandò,
Soun paure garçounet tetant enca de la.

Ansin Diéu m'a priva d'un noum, d'uno famiho,
Mai m'a douna d'ajougne aquelo de moun grand;
Jamai oubliarai l'oustau emé sa triho
Ounte vivien urous de crestian d'un bon sang.

Aqui m'an abari; ai treva lis escolo,
Ai travaia de tèsto e di man, majamen,
Enjusquo que l'Armado e qu'uno guero folo
Prengon lou tout de iéu, servènt au Regimen.

Aviéu deja pensa èstre prèire-felibre,
Mai i'avié dins moun cas forço grame à tria;
Lou faguère, valènt, tre que fuguère libre;
Ansin aurai viscu, ansin aurai briha!

N'en gramacie Diéu qu'a vougu talo causo,
Tau bonur, tal ounour à-n-un paure ourfanèu.
Tant que pourrai servi, fin-que vèngue la pauso,
Aro que mi péu brun viron blanc coume nèu,
E qu'enfin nous veguen, l'adourant, dins lou cèu!

6 de desèmbre 72

SOULOMI PER UN VEUS MALUROS

Au bon felibre Louis Gros

Pènsè à vous, paure ami, qu'avès plus la coumpagno
Emé quau, proun urous, vivias en bon acord,
Aro que, chasque jour, n'en subissès la lagno,
Leissas un prèire vièi vous plagne de tout cor.

Coumprene lou grand dòu toumbant à la subito
Après just quàuqui jour d'aquelo malautié
Que venguè vous rauba la femo qu'èro aquito,
Pèr vous, coume uno maire, en fidèlo mouié.

Reviéure lou bonur qu'ensèn dins la jouinesso
Avès viscu de tèms aumento li regrèt,
Mai noun pòu s'oublida l'estrèmo countentesso
Que Diéu dins sa bounta largavo à si sujèt.

Dirés-ti, coume Jo, - Diéu me l'avié baiado...
De me la retira quènti soun si resoun ?...
Perqué subitamen me l'a-ti retirado ?...
Lou coumprene pas bèn. D'elo, aviéu tant besoun!

Si gràndi qualita de femo vertuoso
Sèmpe li repassas dins voste entendamen,
Subre-tout soun gentun e sa carita blouso:
Diéu vous avié gasta, digas-lou, pèr lou mens.

Qu'un jour la reveirés, brave ami, lou fau crèire
Dins l'eterno en-dela! S'aro, sias malurous,
Fau viéure dins l'espèr qu'ensèn pourrés ié sèire.
Proche dóu créatour ounte prègo pèr vous,
Permié lis elegi, recampa tóuti dous.

Vau-Rias, 8 de juliet 74

SENSO REGRET...

Sènte veni l'istant que quitarai la terro,
Leissant à mis ami li libre, lis escri
E ço qu'ai acampa desempièi que la guerro
M'a rendu libre, enfin, d'óubra pèr Jèsu-Crist

Emai pèr ma Prouvènço e manteni sa lengo
Que nous lagno de vèire en qunte estat se mor
Mau-grat ço qu'avèn fa: La perdo dis arengo
Pèr empura lou fiò qu'èro dedins li cor!

Mai regretarai pas, ah! noun! lou mounde d'aro
Ounte me sènte pas, se n'en manco, en acord,
Ounte atrobe pas meme, en tubant moun cigaro,
Uno resoun de gau, enca mens d'estrambord!

Es un brut infernau di cant e di musico,
Alor qu'aurias besoun de silènci, de pas;
Lou matraquage, enca, d'un gènt o d'uno clico
Pèr vous vèndre de nou, quouro n'en voulès pas.

Uno grèvo finis quouro uno autre coumènço
Dins un seitour publi ounte noun se dèurié
Pèr la posto, li trin, li banco e, sèns defènso,
Lou pople n'en patis e vuevo si denié!

De tout tèms s'es rauba, se soun coumés de crime,
Mai jamai coume vuevo; li maufatan soun fort
D'audàci, de vioulènci, escap ilustrissime,
Faguènt d'orre degai e semenant la mort,
De-fes prenènt d'outage e tuiant sèns remors.

Volon faire passa de lèi abouminablo
Contro l'ordre de Diéu e lou dre naturau;
Volon que d'escoulant agon, proun discutablo,
Couneissènço trop lèu dis ate counjugau.

Raro soun di cansoun lis èr e li paraulo
Pousquènt rivalisa'mé li dis ancian tèms.
Apoundès lou teatre e li filme, tout miaulo
Lou degai de l'amour tant bèu dins soun printèms.

Nòsti sòu valon rèn, se coumerço en fisanço,
La vido sèmpre crèis i'a plus d'or ni d'argènt
E lou pople, pas fièr de nosto caro Franço,
Auisis, dins soun parla, touto meno de gènt.

Li jouine volon plus faire un mestié penible:
Lou burèu, la retreto atrivon sa grand' part;
Vènon lis estrangié, noumbrous lou mai poussible,
E manco d'artisan óubrant emé soun art,

Antan, noste païs, subre-tout agricole,
An vougu lou vira en endustriau fres,
Pamens avèn pas proun, au founs de nòsti colo,
De tourbo, de carboun nimai de minarés.

Alor qu'un grand prougrès s'es fa dins la teinico,
Dins lis amo e li cor lou countràri se vèi;
L'ome n'óublido Diéu: la Glèiso catoulico
Lou vanto e buto ansin li crestian en desrèi.

Dins li tèmple sacra, passado la countèsto,
Lou fidèu dèu subi d'estrango nouvèuta.
Perqué vougué chanja ?... La vièio fe nous rèsto
E sufis is uman que n'en soun encanta.

Mai lou noumbre de prèire e di seminaristo
Demenis e se found, nous baïant de soucit;
An quita la soutano e voudrièn plus de quisto,
Car volon travaia sènso dire merci!

Pamens es un pres-fa d'ensigna la dóutrino,
D'alesti lis enfant à viéure santamen,
De vesita li gènt que la doulour peirino
E de mena lis autre enjusqu'i mourimen.

Se regrèto, l'on saup, lou tèms de la jouinesso;
Veramen i'a de que, sènso res engana,
Talamen i'a d'óurrou de pertout sènso cesso,
Qu'avèn de li subi coume de coundana!

Dins la vido de vuei, fau avé de dardeno
E li gènt pèr n'avé farien sabe pas que,

Jogon gros au tiercé n'esperant quauco aubeno,
Lou Gouvèr n'en prouficho e ris d'aquéu trafé.

Avian pas d'avioun, de radio ni d'image
Sus un pichot écran, mai avian de lesi!
Cadun prenié soun bon ounte avié d'avantage
E l'on s'amavo miés e viéure èro un plesi.

Abriéu 1974.

NOÇO D'OR PREIRALO

Bonur! Moun Segnour-Diéu a permet qu'arribèsse
A coumta cinquanta an de menistère atiéu
E d'encaro pousqué, proun gaiard, lou counfèsse,
Vèire li gros malaut de l'Ouspice ounte siéu.

Quant de cop m'aura fa de celebra la messo,
De souna, sus l'autar, lou cors e sang dóu Crist,
De prega, d'imploura la divino proumesso
Pèr faire intra pu lèu lis amo en paradis ?

Quant de fes ai pourta la santo oustio blanco
I bràvi coumuniant sus la lengo, à geinoun,
Urous de vèire enca, maugrat lou flot que manco,
D'amaire de moun Diéu, de fidèu à soun noum.

Quant de cop ai leva moun bras benesissèire
Sus d'umble pecadou regretant si pecat
E vouguènt, di counsèu, segui lou plan courrèire
Pèr deveni meiour, pèr plus èstre endeca.

Ai bèu-cop bateja d'enfant qu'aro soun vostre.
Ai marida de couble urous de s'aparia.
Ai alesti de vièi que partien d'encò nostre,
M'escuse s'ai fauta, Diéu bon, de fes que i'a.

Un mié-siècle ai óubra dins lou sant menistèri
Mai o mens digne, ô Diéu de touto santeta:
Vegués ma fe, siéuplèt, e noun li vitupèri
Que, de moun estamen, auriéu amerita.

Cinquanta an d'amistanço emé moun Segne-Mèstre
Qu'a perdouna, lou crese, au serviciau que siéu;
Es grando la favour e sènte lou bèn-èstre

D'espera lèu Lou vèire e l'atrouba tout viéu.

Mai, avans, faudra bèn uno darniero messo,
Un sacrifice sant, à l'ouro de parti,
De quita pèr toujours li terrèstri richesso,
Car es lou sort, la lèi: Se mor pas sèns pati!

Adeja gramaci, moun Diéu, pèr vòsti gràci
Qu'an prevengu, segui, ma curso, eicito-bas;
Voua déurai lou bonur d'adoura vosto fàci
E de sèire, encò vostre, à l'eternè repas.

Sus terro e dins lou cèu, à la Ternita Santo,
Ounour, glòri toustèms e fin-qu'eternamen.
Que touto amo inmourtalo e que l'amour encanto
Emé lis elegi lausenje Diéu / Amen!

II -LI REVIRADURO

CANSOUN DE SETEMBRE

Pouèmo d'Alfred Biot

Musico de Benjamin Godard

1

Dessus li mount luenchen assourni pèr si velo,
Lou vèspre es descendu discrèt e famihié,
E la niue, en risènt, desgruno sis estello
Coume li perlo d'un coulié.

2

Eila, vers lou coustau que flambejo à sa visto,
La luno a desnousa sa raubo verd-lusènt,
La dirias que chancello e tremolo en requisto
Pèr ié pausa soun ped d'argènt.

3

Tout dor, l'aucèu, la flour, la grapo, tout soumiho,
L'aureto caressanto au ribeirés dóu clar,
E, soulo sur la terro, uno pensado viho
Au dous pensié de toun noum car.

Viraduro dóu felibre de l'Autar

L'ANEU D'ARGENT

Roso-Moundo Gérard

Musico de Chaminade

Roundèu

Lou car anèu d'argènt que, vous, m'avias douna
Gardo en soun ciéucle estré nòsti proumesso enclauso;
De tant de vièi record recataire oustina,
Soulet m'a counsoula dins mis ouro de pauso (bis)

Tau un riban entour de flour e pèr encauso
Lou bouquet tèn encaro, alor qu'es abena,
Tau l'umblè anèu d'argènt que, vous, m'avias douna
Gardo en soun ciéucle estré nòsti proumesso enclauso.

Peréu quouro vendra l'oublit de touto causo,
Dins lou cercuei de bos de blanc capitouna,
Quouro sarai dourmènt sus li proumesso enclauso,
Vole que brihe encaro à moun det descarna
Lou car anèu d'argènt que, vous, m'avias douna!

(Viraduro dóu felibre de l'Autar)

CANSOUN DIS OURO

Pouèmo e musico de Savié Privas

1

Pèr quau saup ama lis ouro soun roso,
Car es lou bonur qu'éli fan greia,
Au jardin secrèt di flour sèns clouroso.
Lis ouro soun roso
Pèr quau saup souffri!

2

Pèr quau saup rava lis ouro soun griso,
Car es de soucit qu'éli fan leva,
Au cor treboula pèr d'amàri criso
Lis ouro soun griso
Pèr quau saup rava!

3

Pèr quau saup souffri lis ouro soun sourno,
Car es de doulour qu'éli fan freni,
Dins l'amo blessado au brut di cafourno.
Lis ouro soun sourno
Pèr quau saup souffri!

4

Pèr quau saup mouri lis ouro soun blanco,
Car es lou repaus qu'éli fan flouri,
I cor destaca di vivènti branco
Lis ouro soun blanco
Pèr quau saup mouri!

Viraduro dóu felibre de l'Autar, 1971

LOU CREDO DOU PAISAN

Paraulo de S. e F. Borel

Musico de G. Goublier

1

L'inmensita, lou cèu, li mount, li plano,
L'astre dóu jour qu'espandis sa calour,
De nòsti pin li fourèst abelano
Soun toun óubrage, ô divin Creatour!
Umble mourtau davans toun obro flamo,
Au calabrun, quand lou soulèu descènd,
Ma feblo voues s'aubouro de moun amo
Pèr te lausa, moun Diéu ounnipoutènt:

Refrin

Iéu, crese en tu, Mèstre de la Naturo,
Semenant de pertout vido e fegoundita,
Diéu pouderous qu'as fa li creaturo,

Iéu, crese en ta grandour; iéu, crese en ta bounta (bis)

2

Dins li gara cava pèr moun araire,
Quouro es lou tèms, alargue à plen de man
Lou pu bèu blad que greiara dins l'aire,
L'espigo, pièi, sourtira d'aquéu gran.
E, se, de-fes, la grèlo o la tempèsto,
Sus ma meissoun, coume un flèu fai de mau,
Contro lou cèu, noun pas leva la tèsto,
Lou front clina, implore lou Diéu-Aut:

Meme refrin

3

Moun travai dur fai sortre de la terro
De que nourri ma femo e mis enfant;
Miés qu'un palais ame ma granjo entiero,
A l'esplendour preferisse mi champ;
E, lou dimenche, au repas de famiho,
Dins la vesprado ounte manjan ensèn,
Entre mi drole e ma femo e mi fiho,
Lou cor countèt, ai fe dins l'an que vèn:

Meme refrin

4

Se lis ourroure d'uno terriblo guerrou
Venien enca frapa lou païs miéu,
Sèns balança, eila, vers la frountiero
M'enanariéu, subran, emé mi fiéu,
S'èro besoun, balariéu ma vidasso
Pèr proutegi, pèr venja lou drapèu
E, fieramen, en degun fasènt plaço,
Tant rediriéu i porto dóu toubèu:

Refrin

Iéu, crese en tu, Mèstre de la Naturo,
Tu que lou noum divin emplis l'inmensita,
Diéu pouderaus qu'as fa li creaturo,
Iéu, crese en ta grandour; iéu, crese en ta bounta! (bis)

Viraduro dóu felibre de l'Autar

III - LI RACONTE

LOU DINA RAUBA

A Veisoun, i'a d'acò uno cinquanteno d'an, li bòni femo d'oustau anavon lava soun lingè de bugado à la passarello. Lou biau ié passo, emé soun aigo fresco e lindo d'abito, quouro arribo pas la grosso aigo, pèr tèms de chavano.

Lis escolo publico èron pas luen d'aquí, e drouloun e chatouno trevavon lou rode; d'autant mai qu'à-n-un endré se poudié faire de resquiheto, agradivo pèr lis enfant, se noun pèr li maire óbligado de pedassa lis estras.

Un jour, adounc, vaquí que dous drole, qu'apelaren Gusto e Louviset, s'avisèron que la femo dóu Masset, la Bregido, que lavavo afeciounado, avié penja à-n-un sause lou panié de sa blasso. Uno idèio dóu diable venguè au Gusto que diguè à soun cambarado:

- Digo, Louviset, se mancavian l'escolo ?... Vos que ié jouguen lou tour à la Bregido de ié manja sa biasso ?... Vène! Vène! Anan rire!

Ço que faguèron, en s'avisant de noun èstre vist pèr li bugadiero atravalido.

A l'ouro dóu dina, rintron cadun à soun oustau. Lou Gusto avié pas gaire fam, lou Louviset mangè quand meme; mai, coume èron en trin encò dóu Gusto, vaquí que la Bregido, assabentado pèr si coumpagno, vèn se plague e faire avoua:

- Poulissoun que siés / Maufatan!... e lou rèsto!...

Coulèro de la maire — lou paire èro au four de caus, à Santo Catarino — escuso à la Bregido, foutado au Gusto e zóu! embarra dins la remisio ounte i'avié lou porc à l'engrais.

Quant de tèms ié restè ?... Noun sabe, mai ço que m'an di: es que, de la pòu, ié venguè uno sourtido de cebenchoun! Vaquí ço que l'on gagno à faire de marrit tour. Avisas-vous!

EMPASSA D'AGUIO

Li tanto que m'an abari — davans Diéu soun! — estènt moudisto e dins la counfeicioun pèr femo, avien l'abitudasso de planta d'espigolo à soun coursage e, de fes que i'a, en óubrant, aquélis espigolo toumbavon. Ounte ? Un pau de pertout, pèr lou sòu, sus la banco, sus la taulo e meme dins li sieto. Es ansin que n'en levère uno de dedins ma soupo. I'avié un Diéu, e sis ange, pèr nous aparà d'un malur.

Bèn talamen qu'un jour, tanto Soufio, que souffrissié d'uno doulour au bras, anè counsulta lou doutour Mazen, mège de la famiho. Aquest la faguè desabiha d'en aut, reluquè lou bras, lou paupè, l'esquichè, pièi anè querre uno pichoto pinso e de-qué pessuguè ? — Uno aguio!

Coume se faguè que ma tanto avié empassa 'no aguïo, qu'aquesto aguïo avié fa soun camin dins l'ourganisme uman sènso rên desrenja, enfin qu'èro sourtido pèr lou bras ? Mistèri! Mai causo veraïo, l'afourtisse. N'en siéu esta lou temoui espanta, aquelo estrangeta dèu se dire.

LOU PRESTIGE

Lou prestige que vous counferis l'argènt, lou veguère tout clar, un jour, au grand semenàri d'Avignoun ounte m'atrouvave;

Après la grand' guerro de 1914-1918, i'erian uno deseno, pas mai! Noste Archevèsque èro Mgne Latty. Estudiavian e nous alestissian à recebre lis ordre sacra, li minour d'abord, li majour en seguito.

Un an, devié èstre pèr Sant Pèire e Sant Pau, noste coundisciple Jan... que me tutejavo, iéu arribant de Niço, de l'Escolo di Voucacioun Tardiero, sènso m'avé couneigu, faguè sa retrètò preparatòri e reçaupè lou darrier ordre sacra: lou sacerdòci. L'assisterian, coume acò se dèu faire.

A-n-aquelo óucasioun, pensère bèn faire de pourgi à noste coulègo uno pichoto soumo d'argènt que n'en poudié dispausa pèr si besoun o si fantasié. Eh! bèn me creirés, lou sabe, dins soun gramaci espanta, me diguè un vous gros coume lou bras. Ere pamens lou meme ome!

Ah! l'argènt, l'argènt! Se dis en risènt, mai es bèn vrai: Pagas, pagas, fasès-lou vèire. Sarés ansin bèn counsidera!

L'ESCUPI

Ero i proumié tèms de moun sacerdòci. Veniéu d'èstre ourdouna prèire, après la guerro de 1914-1918, après lou coumplemen de mis estúdi à Niço e li cinq an óbligatòri de Grand Semenàri, en Avignoun. En esperant que Mounsegne de Llobet me mandèsse à Pertus, coume vicàri, restave à Veisoun, encò de mi tanto, e m'avien carga dóu service de Vilo-Diéu, ounte un bon crestian, Francès Du, marchand de la, me menavo, lou dimenche, e me radusié. Disiéu ma messo, lou matin, à la capello de l'Espitau.

Un jour, adounc, devié èstre un dimenche, que, vesti d'uno soutano e d'un capèu flambant nòu, m'adraiave de-vers la catedralo en prenènt l'acourcho dóu camin founs, caminet que passo de darrié lis oustau de la routo d'Aurenjo, fièr, trop fièr de segur, de moun abihage:

-Vanita di Vanita! me toumbè dessus, venènt d'uno fenèstro, un escupas que l'escuraire avié manda, segui d'un crid, sènso s'avisa que quaucun passavo de dessouto! Lou sequère vitamen sus ma raubo emé moun moucadou e me n'en vantère pas!

Fau lou vieiounge, aro, pèr remena lou triste record. Que just me capitèsse aquí au moumen de l'escupimen, èro que Diéu l'avié permés. Fasié pas doutanço! Ero-ti un avertimen de ço que m'navo arriba dins la santo Glèiso ? Bessai!

De fèt, au sèns figura, quant de nego-bon-Diéu an escupi sus lou clergié! Quant d'impie en bavourleja sus lou sacerdoti, en generalisant lou marrit coumpourtamen de quàuquis un, d'eicepcioun. Ansin, i'a de marrit mounde dintre li mege, li noutàri, lis avoucat, e n'en fau pas mespresa pèr acò la medecino, la basocho, la magistraturo. Vaqui perqué uno flamo entencioun de preguiero es la counversioun di mespresènt, di pecadou.

LOU DESPICHOUS

Veguère, mai que d'un cop, à N.-D. de Lumiero, la ceremounié de la partènço de quàuqui jouvènt forço pretoucanto. Li gènt pious venien ié beisa li pèd, enterin que se cantavo: « Urous li pèd d'aquéli que van pourta l'Evangèli au mounde ». De fèt, aquéli nouvèu prèire anavon parti, e sabien pancaro s'èron destina i glas dóu Pole nord o bèn i fiò dóu Ceylan. Devien, si Mèstre, ié baia sa fueio de routo tre que la ceremounié èro acabado. Pensas au bate-cor que devié ié pica dintre!

Quouro fuguère ourdouna prèire, en 1925, Mounsegne de Llobet me fisè d'ana dire la messo, de Veisoun ount ère à Vilo-Diéu, vilage proche, li dimenche e jour festiéu. Ço que faguère, mena en jardiniero pèr un pious Veisounen nouma Francés Du, jouvènt d'uno famiho Souïsso, marchand de la e de peissoun. Acò durè gaire, car me mandèron pièi coume vicari à Pertus.

Reveguère, en seguido, moun brave Francés Du, au mié di Paire de Lumiero, coume Fraire; pièi, lou mandèron à Paris, carriero dóu Bac, pèr-fin de s'alesti à servi de coumpan i Messiounàri dóu Grouenland, à l'uba dóu Canada. E vaqui qu'un bèu jour ié partiguè urous.

Se saup quènto vidasso se ié meno e lou merite d'aquéli ome qu'assajon de crestianisa lis Esquimaud: la fre, la nèu, la biso, vièure de counservo, creba lou glas pèr pousqué avé de pèis fres, se faire trinassa pèr de chin, risca d'èstre assassina, èstre encafourna dins d'iglou, cassa e manja lou carribou, lou biòu d'eila. Basto! Noste Francés Du tenguè lou cop tant que pousquè.

Un jour, lou Paire que servié ié vèn coume acò: Fraire Francés, sian counvida, à-niue, — pèr la famiho vesino qu'an tua un carribou. Avèn de i'ana e de pas faire li despichous. De fèt, i'anèron e lou Paire faguè d'ounour à la pitanço, mai, pèr lou Fraire fuguè pas parié, la manjaio poudié pas descèndre. Lou chèfe se n'avisè, parèis, cargue'no coulèro, escupiguè dins lou plat e fourçè Fraire Francés à empassa ço qu'èro presenta, que lou rendeguè malaut.

La bono voulounta fai pas tout! Acò fuguè lou cop de gràci. S'entournè en Franço, à si fres, pèr avioun. S'es marida, es paire d'uno noumbrouso famiho. Es pèr vous moustra, lou merite d'aquéli Messiounàri. N'an forço mai que li jouvènt dóu clergié seculié, enco nostre, qu'an pamens soun merite. Service religious eici e service religious amount es pas parié! Diéu l'estimo enca miés que nautre.

8 d'avoust 73

COUME UN VOULUR...

Ero au tèms dóu pichot camin de ferre d'Aurenjo au Bouis, acò vòu dire que dato pas de vuei. Aquéu trin sus draio estrecho rendié service e fasié plesi, foro que rendié malaut aquéli que, coume iéu, cregnissien si long e incessant baloutamen. Lou prene pèr ana vèire jouga'no bello pèco au teatre anti d'Aurenjo se poudié faire, mai vous gastavo lou plesi que pagavias dous cop. Basto!

A Veisoun, sus la grand'plaçò dicho de Mounfort, entre lou magasin de Juliard e l'oustau de Coulounèu, i'avié'n pichot perruquié, un couifaire, qu'ai couneigu, qu'èro moudèste, bèn simpati e ouriginau emé soun coulié de barbo, ié disien Segne Lanchier. Vivié aqui emé sa femo, s'entendènt perfetamen, tras qu'urous, barbejant e couifant si pratico. Lou dimenche, dins lou tantost, barravon la boutico e, coume fan li gènt, anavon s'espaceja quouro d'un coustat, quouro de l'autre. Fasié gau de li vèire.

Un dimenche, adounc, s'atroubèron sus la routo de Malauceno, en bas dóu Crestet, vilajoun quiha sus la cresto de la colo e tout proche d'un moulin. Eron à mand de travessa l'Ouvezo, riblero de l'endré, quouro, arribant de l'estacioun d'Entrechaus, lou trin subran apareiguè pèr tambèn travessa lou pont e ana s'arresta à l'estacioun de Veisoun. La femo, Dono Lanchier, l'on saup pas coume s'èro arrenjado, avié engaja lou taloun de sa caussaduro entre li rai e tiravo, tiravo... lou trin i'arribavo de dessus, soun ome se precipito pèr l'ajuda, mai de bado, tóuti dous fuguèron pres e abima pèr lou moustre de ferre que s'arrestè trop tard. Quente double dramò!

Acò faguè dins Veisoun uno grosso emoucioun. I'aguè un fube de mounde à soun enterramen. La paraulo dóu Criste revenguè en memòri:

- Vendrai coume un voulur.

Dóu biais que s'èro passa, fau crèire qu'èro soun ouro. Emai:

- La pu grandò probò d'amour es de douna sa vido pèr aquéli que l'on amo ».

QUOURO N'T'A TROP...

Es pas tóuti lis an, dins la Vau-Cluso, que li champignoun espelisson. Fau, pèr acò, que plóugue dins lou courrènt d'avoust. Alor, fin de setèmbre o debuto d'òutobre, se n'acampo enjusqu'en desèmbre: recordo souvènti-fes aboundouso en de rode que se cercon e que lis amateur couneisson. Es uno bono óucasioun de refaire couneissènço emé la mountagno.

I'a d'abord li boulet-tèsto de negre; li gros blanc de nèu, que fau bèn couneisse, car n'i'a de marrit que li sèmbelon; li pisso-can o cèpe de Bourdèus, que n'en fau leva la mousso; lis oronge jaune emé sa capucho roujo; li grisè que soun fréule; li mato o champignoun de piboulo; li pignen nouma laitàri delicious; li girolo o cantarello; lis auriho d'ase; li bounet de capelan; li vióulet; li nankin que noun sabe soun noum; li mouriho e n'en passe, sènso coumta uno ribambello de pichounet nouma mousseroun.

A Menerbo, dins lou Luberon, e à Veisoun, sus la mountagno de Mars, de vers Santo Catarino, m'es arriba, dous cop, un tour pendable: Acampave de champignoun, muni de dous panié. Quouro l'un fuguè plen, pèr pas lou carreja inutilamen, car me pesavo, l'escoundegüère à-n-un endré que

remarquère bèn, e countunière ma culido en-jusqu'au calabrun que, lou sabès, toumbo vite en autouno. Alor me despachère d'ana querre moun proumié cargamen mai de bado! Viro d'eici, viro d'eila, rèn! L'atroubère pas! Es curious, en mountagno, coume i'a de rode que se sèmlon! E se fasié niue. De que faire ? Poudiéu pas mai musa, car, encò miéu, se sarien fa trop de bilo.

M'entournère, alor, entristesi, soucitous, emé l'idèio de reveni l'endeman e de repassa pèr tóuti lis endré que me n'ensouvendriéu. Moun velò èro plus bas, dins une granjo, l'encambère mau-countènt. E revenguère, l'endeman matin, e atroubère facilamen moun panié, tras que countènt. Ço qu'es pamens, quouro n'ia trop!... Adounc, cresès-me, vau miés pas i'ana soulet, i champignoun, e agué quaucun emé vous pèr carrela vosto preso e pèr n'aprouficha!

1972

LI COUNSEQUENCI D'UN MARRIT TOUR

Estènt segoundàri, o vicàri, à Pertus, moun proumié poste, abitave à-n-un endré que ié disien lou loucau Jano d'Arc. Aqui, loujavon tambèn dos Sorre de Sant Francés d'Assiso, que sa Meisoun-Maire èro en Avignoun. Aqui se fasien, li dijòu e dimenche, li patrounage catouli di fiho e di garçoun; aqui i'avié lou teatre pèr quand se jougavo de pèço. Aquest immobile èro uno richesso pèr la parròqui.

Aquest loucau èro un pau luen de la glèiso; falié passa davans la capello de l'Espitau e pèr lou Granié, valènt-à-dire l'endré que li païsan ié boutavon lou blad, lou gran. Iéu, pèr gagna de tèms, enfourcave ma biciéuceto.

Adounc, un matin, quand venguère pèr prene moun velo, l'atrouvère desgounfla. Li drole dóu patrounage, la vèio, m'avien jouga lou marrit tour. De que faire ? Ere pressa, car èro pulèu en retard e i'avié messo à dire, à L'Espitau. Partiguère d'à pèd, arribère just, diguère messo à l'ouro dicho, mai aviéu pas pu lèu acaba de celebra que me venguèron souna per uno vesino dóu loucau qu'èro à touto estrema.

Alor, sènso velò miéu, demandère à-n-un prèire, retira dóu menistèri qu'èro aqui e que devié celebra après iéu, de me presta lou siéu; l'encambère e arribère à l'oustau vesin dóu loucau ounte la malauto fasié si darrié badai. Aguère just lou tèms de ié baia'no assoulucioun. Sa chato, qu'èro aquito, me diguè que sa maire mancavo jamai de recita, cade jour, si tres Ave Maria. Ansin, un marrit tour avié manca de leissa parti uno femo sènso sacramen: li tres Ave Maria i'avien vau la gràci de pas parti dins l'en-dela sènso lou perdoun dóu menistre de Diéu.

1972

APOUSTOULAT MANCA

Vaqui encaro un record de la guerro de 1914-18 qu'aviéu óubrida de nouta: Me rapelle qu'au vilage de Chatancourt, dins la *Meuse*, m'ère atrouba em'un sódard coume iéu de moun païs de Veisoun que ié

disien Clarisso; èro un brave ome, mai sènso religioun. Avié la reputacioun d'un nego-bon-Diéu e d'avé meme d'idèio avançado, uno meno de coumunisto. Basto! Barrulavian ensèn amistousamen. La guerro escafavo li diferènci de mentalita.

Lou curat dóu vilage, M. l'abat Holard, èro forço brave pèr li sódard, l'anavian vèire, lou vèspre, pèr passa la vihado, e tout en tubant de cigareto, nous fasié béure de « grog », valènt-à-dire d'aigo caudo sucrado em'un cuié d'aigo-ardènt.

Adounc li campano de la glèiso sounèron pèr li vèspro e, après quàuqui vai-e-vèn, m'asardère à counvida moun coulègo d'intra dins la glèiso. Aquest se faguè pas prega. Aribavian au moumen dóu salut dóu Sant Sacramen. Mai quènto cacoufounio! Li couristo cantavon mau, cantavon faus à faire japa li chin. Ero deplourable. Pèr un cop que s'asardavo dins uno glèiso, moun Clarisso n'en fuguè talamen mau impressiouna que me declarè soun mau-cor, quouro sourtiguèrian. Segur que lou Segnour avié bèn agrada li cant d'adouracioun, mai nosto ausido umano s'èro pas regalado. Fuguè lou soulet cop e pèr me faire plesi!

Adounc, quand l'on vèi que pèr li fèsto poulari l'on s'alestis tant à l'avanço e l'on fai tant de frès pèr lou plesi di gènt, i'a de que avé vergougno quand, pèr noste Diéu, Creatour e Sauvaire se fai pas mai d'ounour, se mostro pas mai d'estrambord. Déurié i'avé rèn de tant grand, de tant bèu, de tant soulenne pèr Eu. E, se se canto, dóu mens que se cante pas faus! Pieta pèr l'ausido!

LI DARNIE LOUP DOU LUBEROUN

Aquelo istòri nous remounto à bessai dous-cents-an: Ma servicialo de Menerbo la tenié de soun paire, Placido Clot, que la tenié de soun paire, éu, l'aguènt viscudo.

Aquel aujòu de quau s'agis avié sa granjo en bas de Vau-Menoun, que s'atrobo i pèd dóu pichot Luberon regardant l'Uba. Aquel ome, adounc, revenié dóu vilage sus sa carreto, èro l'ivèr, e rintravo encò siéu, au calabrun, quouro s'atroubè agarri pèr de loup vertadié que bramaron de fam e seguissien l'equipage, menaçant. De que faire ?... Faguè peta lou fouit contro la miolo e contro la feruno. Pièi, lou dangié creissènt, aguè l'idèio de bandi li pan qu'adusié à la granjo. Acò reüssiguè! Li loup se ié jitéron de dessus. Es ansin, en semenant sa prouvesioun de pan, que pousquè arriba, counta soun auvèri, desatala, estrema li galino, la cabro, li fedo. Se dourmiguè gaire à l'oustau. Ero pas sènso emoucioun nimai sènso cregnènço!

N'en fuguè quite, l'endeman, pèr tourna au vilage, counta l'afaire i cassaire e tourna mai croumpa de pan, urous de se n'èstre pas trop mau tira.

Noun sabe, après aquel auvèri, se li loup faguèron encaro di siéuno au Luberon.

10 de juliet 1972

FAUS RESOUNAMEN

Estènt curat de Menerbo (Vau-Cluso) iè retroubère aqui noste ancien camarado de la grand' guerra 1914-1918, lou menaire de la veituro medicalo dóu segound bataioun dóu 58en R.I. ounte istère coume brancardié, pièi coume infiermié.

Avié agu de merite, car lou travai èro dangeirous, car li camin èron pas tout plan, e nous avié rendu service, en carrejant, souvènt nòsti sa, car n'avian proun carga qu'erian de nòsti museto e dóu brancan. Basto!

Adounc mountère lou vèire, un jour, dins lou siéu, au quartié de Jargouven ounte restavo, luen dóu vilage. Soun acuiènço e la de sa femo fuguèron forço gènto. Aviéu jamai vist aquèsto à ma glèiso, mai avien l'escuso d'èstre aluencha dóu païs.

Avien agu d'enfant, sabe plus quant. Lou plus jouine, tras que famihié, se leissavo bèn prene, caressa, e mountavo meme sus mi ginoun: semblavo avé pèr iéu uno amista particuliero.

Lis enfant, gènt o noun, an uno amo. Ié pensère e diguère à Serge Peyron, èro soun noum:

- Es bravet, toun pichot, faudra me lou manda pèr la dóutrino, pèr-fin que fague soun bèu jour, sa coumunioun.

— Pòde pas! Pòde pas, me respoundiguè sènso carcula, l'ai pas fa'is autre!

— Coume ? apoundeguère, sufis que vous sias manca pèr li proumié, cresès qu'avès óbligacioun de countunia emé lou darnié ?... Quente daumage sarié pèr aquéu pichot!

L'aguè rèn pèr faire. L'aguère jamai au catechisme. L'enfant s'es abari sènso religioun.

- *Errare humanum est, perseverare... diabolicum!* »

La respounsableta di parènt es quicon de grèu!

6 de desèmbre 1971

LA MARIO DOU SAVIE

Au jour d'uei, à Menerbo, i'a de gènt que se rapelon encaro d'aquelo femo proun simplasso e vivènt souleto. Restavo dins un oustaloun, que croumpère pièi, quouro fuguè morto, toucant lou presbitèri. La disien dóu Savié estènt qu'aquel ome èro proupietàri de l'oustaloun, que ié laissè, emai di dos femo, di dos sorre, disien li marridi lengo. Basto!...

De que fasié la Mario ? Eh! bèn, tóuti li matin, passavo dins li carriero em'un pichot carretoun pèr enleva lis escoubiho. Proun de gènt, trop d'estajan, ié pagavon un got de vin pur, ço qu'agravavo soun cas. En fin de tournado, la vesian, assetado sus soun escalié. Avié pas fam! La Coumuno ié baiavo un pichot tratamen que ié sufisié.

La Mario avié pas marrit founs. Venié à la glèiso. La vesiéu, à la messo, assetado à soun banc, e quouro passave à coustat pèr faire la quisto, elo, acò me fustibulavo, me viravo subran l'esquino. Auriéu miés ama, pèr lou mens, un pichot risoulet. Lou sabié pas faire. Basto encaro!

A soun oustaloun s'apoundié un caire de terro ounte i'avié tres o quatre óulivié. Un jour, pèr acampa sis óulivo, la veguère que n'en ressavo li branco:

- Mario de que fasés ? Es pas'nsin que se fai!
— Soun miéu! Soun miéu! me respoundiguè!
La quitère en aussant lis espalo. Pauro nèscio!

Mai l'ivèr arribè e la Mario fuguè malauto. La vesiterian emé ma servicialo pèr ié pourta secours. Eh! bèn, quouro ané miés, nous baiè coumessioun de i'adurre de pan, fiheto de vin e de froumage dóu blu. Un autre an, se n'en tirè pas e faguerian soun enterramen. Un fraire, qu'avié encaro dóu coustat de Murs, fuguè avisa e menè lou dòu.

Dèu i'avié tambèn lou paradis, crese, pèr li gènt simple!

L'EN-AUT DE LA CENTURO

A Menerbo, i'a uno meno de castèu que ié dison La ciéutadello ounte dins un ort, au levant, s'atrobo lou cros d'un ome de marco, lou Comte Jaque, Charle de Rantzau, un Danés despatria dins lis Estat dóu Papo pèr encauso d'un escandale poulti...

Dóu tèms que n'ère lou curat, douge an de filo, aquesto ciéutadello fuguè croumpado pèr uno damisello di tres M, Mario, Madaleno Michaud, emé lou benefice de soun obro, de soun talènt dins lou dessin couloura dis estofo...

Aquelo jouvènto manquè pas de me faire vesito, tre soun arribado, e de se faire counèisse. Pode dire que m'espantè proun:

— *Vous n'aurez pas peur, Mademoiselle, toute seule à venir habiter cette austère demeure ?...*

— *Non! me respoundiguè. J'y viendrai passer mes congés.. Puis, j'ai un oncle très gentil qui viendra aussi l'habiter, quand j'y serai. La famille Silvestre, menuisier, garde la clef.*

Basto! La segoundo grando guerro, arribè, malurousamen, e l'ócupacioun alemando seguiguè. La chato venguè se recata à la ciéutadello e peréu soun ounce, Segne Gastal, un ome cultiva, devot e bon parrouquian emé quau fuguerian lèu en bono amista.

Es éu que me faguè la leiçoun en me disènt de me trufa de ço que poudien pensa e dire li gènt que me veirien tirassa un carretoun carga de luzerno pèr mi lapin e de bos pèr nous caufa, croumpa encò de Galetto, dins la baisso.

Es éu que me countè qu'uno niue sa nèço l'avié souna:

— *Mon oncle, venez voir, écoutez, j'entends du bruit.*

L'ounce s'estènt adu, aguènt escouta, avié destousca, dins la vièio tapissarié de la muraio uno negro babaroto que ié moustrè:

— *Un grillon, mon oncle, un grillon, il faut le garder!*

— *Non! Non! C'est un hideux cafard!*

E la jouino chato fuguè rassegurado.

Un autre jour, l'ounce, Segne Gastal, avié pres lengo em'un istitutour d'Avignoun qu'avié d'ambicioun e travaïavo à deveni miés qu'un simple regènt. E ié charravo de si vesito is oustau de bourdelage en disènt:

— *Moi, tout ce qui est humain m'intéresse.*

— *Moi aussi, rebequè Segne Gastal, mais l'humain au dessus de la ceinture.*

Longtèms après, M.M.M. repareiguè à Menerbo, mai maridado à-n-un óficié de Marino e tenènt pèr la man dous poultit garçounet.

Mars 1974

DOU ZERO A L'INFINI

Quouro m'atroubave preparatour en farmacio, à Veisoun — ère jouvènt, i'a d'acò mântis annado — m'ensouvène d'uno drouleto qu'un jour manquè pas de maliço, de couquinarié pèr óuteni ço que voulié: uno boutiheto pèr ié bouta dedins de regalisse de bos emé d'aigo.

Adounc me venguè demanda simplamen un tap, un tabouissoun, un bouchoun. Quau i'aurié refusa ?

— Coume lou vos ? Ansin ? Ansin ?

— Lou vole coume acò!

— Lou vaqui.

— Aro, voudriéu la boutiheto pèr faire de regalisse!

E ié cerquère la boutiheto; mai cresès pas qu'avié de toupet e meme lou biais pèr óuteni ço que voulié, aquelo drouleto!

Eh! bèn, vuei, un tipe d'Argerian m'a fa lou meme cop: Avié desbarca, m'a di, à Marsiho, sourtènt de presoun d'Argié coume ancian Harki, delféura pèr lou Counsulat e manda à Chambéry pèr ié retrouba sa famiho. Adounc voulié faire uno letro à sa maire, en Argié. Quau i'aurié refusa lou service ?... De que ié voulès dire ? Ansin:

Ma chère maman, je suis en France. Je n'ai pas eu le temps d'aller te voir, à ma sortie de prison. Le Consulat m'enverra mes papiers à Chambéry. Je t'écirai de nouveau, une fois arrivé. Mon bonjour à ma sœur Fatima et à toi. Alli Dani.

Mai èro pas tout. Avancère li timbre, naturalamen. Pièi, me diguè qu'avié ges de sòu, qu'avié rèn manja, que s'anavo adraia d'à-pèd. Quau aurié agu lou fege de lou leissa parti coume acò ? Ié diguère: Quant vous fau ?...

— 29 franc!

— Malo-pèsto! Tenès vaqui 10 franc. Pode pas mai faire: siéu endéuta!

— Es que n'ai pas proun d'acò.

— Eh! bèn, n'en vaqui encaro dè.

— 29 franc de camin de ferre!

— Ah! vaqui encaro dè franc, fara trenta franc.

Aqui l'ome fuguè countènt e me poutounè lou front en s'esbignant. La niue venènto, pensère qu'avié pas besoun d'escrèure en francés à sa maire arabo, que i'avié en vilo pas mau d'Argerian que l'aurien miés coumprés e qu'aurien degu l'ajuda coume iéu. Ai fa la carita. Noun fau cava trop founs!

FEINIAN E BOUMIAN

Moun lougatàri de Vau-Rias, Segne Andriéu JOUVE, qu'es ouriginàri de Novo en Prouvènço, e que sian d'ami, me charravo, aièr, de soun ounce qu'èro un tipe d'ome noun ourdinàri: Ero forço brave, parèis, e tras qu'ounèste, mai voulié rèn faire e vivié soul e pichoutamen. L'estiéu, dins li champ, cercavo uno ombro e penecavo, l'ivèr, de davans soun fiò, tubavo sa pipo e soumihavo. Basto!

Soun fraire, proun cop, l'avié charpa de mena aquelo vidasso:

- Te plague, moun brave, de te vèire ansin vesti, coume un bómian, à peno propre, etc.

Eu, ié rebecavo:

- Es iéu que te plague de te crèire dins l'oubligacioun d'ana travaia pèr tóuti li tèms, quand fai caud e quand fai fre! Vai, siéu mai urous que tu! » Fasié quand meme uno eicepcioun à la règlo dóu farniente: Se lougavo pèr faire li vendémio e gardavo lou gasan qu'avié gagna pèr croumpa de jouguet pèr lis enfant de soun fraire, e lis adusié pèr Nouvé. Un default encaro, pamens perdounable, tèms en tèms levavo lou couide em'uno boutiho à la man. Basto!

Quouro l'ami Jouve aguè fini, apoundeguère que, iéu, peréu aviéu couneigu un tipe d'ome d'aquelo meno: Ié disien, crese, Fouquet. Fasié'n pau lou groulié e loujavo dins un cabanoun adoussa i bàrri de Menerbo, mai la majo part de soun tèms lou passavo au Calavoun e m'en adusié de-res, siegue uno anguielo, siegue quàuqui pèis. Ié baiave uno estreno, èro countènt. Aquèl ome avié'n drole, emplega dóu camin de ferre en vilo d'Ate e bèn marida. Souvènti fes aquéu chat avié vougu tira soun paire d'aquelo vido de bómian e lou retira encò siéu ounte pensavo sarié mai urous, mai i'avié l'empèri de sa femo e li lèi de la civilisacioun à óusserva: Rascla si caussuro avans que d'intra dins l'oustau, se lava li man avans de se metre à taulo, noun escupi pèr lou sòu, pas cura sa pipo en foro de la chaminèio, se servi de soun moucadou e sabe plus que mai.

Au bout de tres jour d'aquelo civilisacioun, Fouquet n'avié proun, bèn que fugue bèn trata, teni propre, sadoula, e s'entournavo d'à-pèd à Menerbo pèr ié reprendre sa vido coustumiero.

Un jour m'avisèron qu'èro bèn malaut. L'anère vesita, ié baière li sacramen di crestian. Quand sourtiguère de sa turno, m'atroubère clafi de niero! Un capelan dèu saupre se devoua, meme pèr li bómian!

31 de juliet 74

IV - FANTAISIES

PENSEE D'AUTOMNE

*Le vent a commencé de défeuiller les arbres,
Dans les champs, les jardins et les cours des maisons.
C'est l'automne partout! Les pierres et les marbres,
Eux, ne changent jamais quand tournent les saisons.
Les feuilles, en huit jours, ont pris la couleur jaune
Puis celle de la rouille en tombant tour à tour
Sous le souffle du nord qui fait une œuvre bonne;
Par terre, on les ramasse et brûle en quelque four.
L'homme assiste impuissant, non moins mélancolique,
Au triste changement qu'il observe à regret:
« Dieu, seul, reste immuable, est-il dit au cantique,
De son être éternel conservant le secret! »
L'homme aussi tombera comme chute la feuille,
Rappelé tôt ou tard par son Dieu créateur.
Heureux si, repentant, chrétien il se recueille
Pour attendre humblement l'accueil du Rédempteur!*

30 octobre 1974

LE FACTEUR

*Oui! Dans mon jeune temps, jamais le droit de grève
N'avait été permis si longtemps et sans trêve!
Le travail était dur aussi, certainement,
Mais était supporté sans plus d'émolument.
On aimait le facteur de ville ou de campagne
Ne plaignant pas ses pas, et laissant sa campagne
A préparer la soupe en attendant celui
Qui, pour son traitement, du logis avait fui.
Il connaissait ses gens, un peu de leur famille,
Leur apportait, discret, quand l'intérêt pétillait,
La nouvelle fâcheuse ou l'annonce du jour
Où l'absent reviendra de son lointain séjour,
Ou bien, d'un nouveau-né, l'arrivée en sa cour.
Des amoureux, surtout, il était la conquête
Apportant les aveux, après normale enquête,
Et l'on était déçu lorsque, tant désiré,
Il dépassait la porte et n'avait rien d'œuvré.
En campagne, parfois, pénétrant dans la grange,
Il acceptait de boire, en ami qu'on dérange,
Et qu'il remette un pli venant du percepteur,
Lui, c'était le brave homme et comme un bienfaiteur.
Il n'obéissait pas au syndicat funeste
Qui fait, par ses décrets, du travail une peste.
L'on demande toujours, cahier illimité!
La paix, c'est l'ordre admis dans sa tranquillité
La grève est le désordre et non la liberté!*

11-13 novembre 1974

DISCOURS AUX SAINTS

*Vous, qui nous devancez dans l'au-delà mystère,
Vous êtes donc exclus des charmes de la terre:
Le printemps et l'été, l'automne et puis l'hiver,
Un ciel et ses diamants, la splendeur de la mer,
La neige des sommets et les vallons tranquilles,
Les bois ombrés et les beaux jardins des familles,
L'aube d'un nouveau jour et le royal couchant,
La fleur qui réjouit et, des oiseaux, le chant,*

*Pour vos sens ne sont plus en active existence,
 Ils sont éteints. Plus rien, ni plaisir, ni souffrance!
 De boire et de manger vous n'avez plus besoin
 Et les concerts aimés, d'ici, sont déjà loin.
 C'est la Toussaint! Voilà que nous pensons à vous
 Avec qui nous avons un prochain rendez-vous.
 Etes-vous sans regret d'avoir quitter la terre ?
 Avez-vous tout perdu quittant notre atmosphère ?
 Dont l'exclusivité rendait parfois jaloux.
 Des parents, des amis le commerce très doux
 Avec le vrai donnant une euphorie extrême;
 Regrettez-vous, là-haut, le beau, le bien qu'on aime
 Un abîme entre nous, pour l'heure, nous sépare,
 Mais bientôt de ce temps dont tout être est avare
 S'échappera le fil, car, de l'autre côté,
 Ne sont ni jour, ni nuit et pour l'éternité!
 Bien qu'admis pour toujours au céleste royaume,
 Vous n'y jouissez pas d'un bonheur autonome;
 Mais Augustin nous dit que Dieu pour ses élus
 Réserve avec les biens d'ici-bas qu'ils n'ont plus
 Ceux de l'âme sauvée. A la splendeur divine,
 Source de vie et d'art, valeurs sans origine,
 S'ajoutent la Lumière et l'Amour du Seigneur.
 Les élus sont comblés d'inéffable bonheur.
 Ainsi nous vous croyons. Avec la cour céleste,
 Nous irons regretter, du cœur, le mal funeste
 Et nous contemplerons le Dieu clément et bon,
 Père, Fils, Esprit-Saint, généreux en pardon,
 Et la Vierge bénie entre toutes les femmes
 Grâce à qui, de l'Enfer, on évite les flammes.*

1-2 novembre 1974

L'ENVELOPPE

*Les âmes, de chair revêtues,
 Sont-elles belles toutes nues ?...
 — Je ne sais pas, je ne vois rien
 Ni le mal caché, ni le bien!
 Ce que je vois, c'est de la bête,
 Comme pour moi qui fais l'enquête,
 Elle est diverse et je la plains,
 Car elle aura des lendemains
 Qui ne seront pas enviables,
 Les ans souvent sont pitoyables:*

*Minces et gros, jeunes et vieux,
Femmes difformes jusqu'aux yeux,
Hommes d'un certain âge obèses,
Tous, au teint mât de terres glaises,
Assez sympathiques ou non,
Dotés ou non d'un bon renom,
Plus ou moins beaux, je le proclame,
Vous possédez quand même une âme;
Car vérité des vérités,
Vous usez de ses Sacultés.*

(13 décembre 74)

© CIEL d'Oc – Desèmbre 2007